

四庫全書

集部

欽定四庫全書

劔南詩藁卷七十五

宋 陸游 撰

自警

生世如夢境淹速無定時
少壯不可恃況汝迫耄期
五官及百骸自揣日益衰
客來能送迎要是強支持
百口皆新人所至無舊知
紹興同朝者掃地靡復遺
雖云窮耐久造物豈汝私
餘日真幾何得酒且伸眉

春雨

春陰不肯晴
春雨斷人行
慘澹柴荆色
蕭條雞犬聲
香分豆子粥
美啜芋魁羹
猶勝梁州路
蒙氈夜下程

春寒

冉冉年華過
上元梅花如雪照
江村雲歸翠竇初收雨
人怕清寒嬾出門
香燼已殘爐未冷
客談方劇酒重溫
尚嫌塵境妨幽致
過埭船聲莫正喧

湖桑埭去
樊廬里許

自喜

了了復惺惺
蒼龜未是靈
閒中有富貴
壽外更康寧
身備鄉三老家傳
子一經
春回元不記
出戶四山青

又

身寄人間世
心常古鏡如
喚醒狂蝶夢
掃盡老狐書
年出鄉閭右
貧過仕宦初
村村是桃李
豈獨愛吾廬

簡湖中隱者

夫子終年醉
不醒若為問
我故丁寧書
因遣僕馱黃蘗
詩許登山斲
茯苓疇昔但
知悲驥老
即今誰不羨鴻冥

清宵定許敲門否擬問黃庭兩卷經

短歌示諸稚

流年去不還老狀來無那雖甚顏原貧尚勝夷齊餓再
歸又六年疲馬欣解馱姑幸箠轡空敢復希豆莖好山
嬾出遊敗屋得偃臥飢能儲粟盎病亦有藥裏酒蟻溢
蟠罌茗雪落小礪香火失情偷編簡謹程課豈惟洗幻
妄亦以起衰懦向來名宦事回首如棄唾義理開諸孫閔
閔待其大賢愚未易知尚冀得一个如其畫為農亦未

可吊賀歸耕豈不佳努力求寡過

王子猷謂竹為此君白樂天謂酒為此君余野處
無客每對竹獨酌得小詩

新種疎篁對小軒旋沽薄酒實空尊門無車轍亦何恨
有此兩君堪與言

會稽行

我欲遊蓬壺安得身插羽我欲隱嵩華歎息非吾土會
稽多名山開跡自往古豈惟頌刻秦乃有廟祀禹山形

舞鸞鳳泉脉流湏乳家家富水竹處處生蘭杜方舟泛
曹娥健席拂天姥朱樓入煙霄白塢臨雲雨脩梁看龍
化遺箭遣鶴取茶荈可作經楊梅亦著譜湖蓴山蕨輩
一一難遽數終年遊不厭冰玉生肺腑誦詩有稚童乞
字到俚嫗況復青青衿盛不減鄒魯古詩三千篇安知
闕吳楚土風聊補亡吾言豈夸詡

野飲

春雨行路難春寒客衣薄客衣薄尚可泥深畏驢弱溪

橋有孤店村酒亦可酌
鳬荒小甌炊丹柿青篋
絡人生
憂患窟駭機日夜作野
飲君勿輕名宦無此樂

作野飲詩後一日復作此篇反之

世事如海沙巧厯不能
數身居憂患中殆若墮
甕虎又如住敗屋岌岌日
撐拄中夜風雨至摧壓
固其所孰能知其然徒義
以為主要于一念間不敢
欺仰兢兢日三省寧可自
莽鹵君看昔先師乃媿不
若禹

春晴

雨斷雲歸兩作晴夕陽鼓角動高城客愁正得酒排去
草已直疑煙染成鶯為風和初命友鷗緣水長欲尋盟
不須苦問春深淺陌上吹簫已賣錫

又

常年春日少春晴拂面今朝暝吹輕水閣家家橫小舫
園亭處處聽新鶯桃花不管詩人老菖葉空催野叟耕
自笑此生餘幾許銅駝荊棘尚關情

遣興

莫笑龜堂礪硯胸此中元可貯虛空尚饒靈運先成佛
那計辛毗不作公采藥偶逢丹井客買蓑因過玉霄翁
不須更問歸何許散髮飄然萬里風

又

我是仙蓬舊主人一生常得自由身退歸自合稱山長
變化猶應待帝宸得酒不妨開口笑學人難作捧心顰
塵中且復隨緣住又見湖邊草木新

開歲屢作雨不成正月二十六日夜乃得雨明日

行家圃有賦

東風催雨破天慳行圃歸來剝解顏百草吹香蝴蝶閑
一溪漲綠鷺鷥閑老來每歎論心少貧甚方知覓醉難
猶賴籃輿無恙在呼兒結束入南山

書屋壁

築室鏡湖濱于今四十春放生魚自樂施食鳥常馴土
潤觀鋤藥燈清論養真桃源處處有不獨武陵人

又

鳥道經行隱巢居臥起寬
鹿衣裁短褐龜屋製危冠
舊慕嵇中散今師靖長官
蛟龍雲雨上未必勝泥蟠

與兒孫同舟泛湖至西山
旁憩酒家遂遊任氏茅
菴而歸

過埭維舟古柳根却扶拄杖入煙村
印泥接迹牛羊過
投宿爭林鳥雀喧
酒保殷勤邀淪茗
道翁偃僂出迎門
郊居不與人間事
惟有畊桑得細論

日莫自大滙村歸

荀輿伊軋莫山昏水敗陂塘路僅存出谷鐘聲知過寺
隔林人語喜逢村廟堧荒寂新犂地堤草淒迷舊燒痕
兒子念翁霜露冷遙持炬火出柴門

八十四吟

八十仍逾四遲留未告行筮言災退散醫賀脉和平
畊牧猶能力癡頑每自驚所嗟經學廢心媿濟南生

晚步至湖上

柴車無與駕蓬艇亦須人賴有拄杖子能扶羸病身雲

山翠屏合煙月玉鈎新
蕭散湖塘路微風吹葛巾

春陰

窓昏不見字今日罷觀書
迹寄浮生內心遊曠劫初
太山均蟻垤聖域亦蘧廬
兀坐還成倦荒畦去荷鋤

題野店壁

斷橐投衣橐殘壺挂馬鞍
寺荒尋店久橋敗涉溪寒
道里逢人問題名拂壁看
平生慣行役隨處得加餐

題寺壁

菴居渾似罷參僧除却癡憨百不能意倦有時憑曲几
興來隨處曳枯藤雲山直去寧須伴薜磴高攀不計層
聞道鼉鳴天欲雨松門小住看雲興

題幽居壁

青山四抱路盤紆天與先生卜草廬雲冷數聲聞斷雁
溪清百尺見遊魚新醪薄薄閒尋醉殘髮蕭蕭悶憶梳
莫謂躬耕便無事百年京洛尚丘墟

又

聲利場中偶解圍悠然高枕謝招揮
山前曳杖尋僧去
林下收碁送客歸
城市氛埃那許到
比鄰煙火自相依
纓冠束帶前身事
散髮今惟勃落衣

思蘄州

老來百念盡消磨
無奈雲安入夢何
壯憶公孫劒器舞
愁思賓客竹枝歌

又

武侯八陣孫吳法
工部十詩韶馥音
遺蹟故祠春草合

略無人解兩公心

梅開絕晚有感

年年踏雪探梅開
二月今年始見梅
從此逢春心轉嬾
小詩不擬覓花栽

又

尋梅不負雪中期
醉倒猶須插一枝
莫諱衰遲殺風景
卷中今歲欠梅詩

園中晚飯示兒子

一飽何心慕萬鍾
小園父子自相從
蚍蜉布陣雨將作
蛺蝶成團春已濃
澗底束薪供晚爨
街頭糴米續晨舂
盤餐莫恨無兼味
自繞荒畦摘芥菘

自詰

修行力量淺
觸事常寡悰
端居本無事
奈此百憂攻
今晨默自詰
世豈不汝容
漱濯臨清流
歡歌蔭長松
緩步有夷途
遠眺多奇峯
野叟時相尋
村酒亦自醲
于道忽少進
一掃芥蒂胸
輟釜本常情
寧說飯後鐘

野飲

農事未興思一笑春齋可采魚可釣霏霏小雨忽已晴
堤上相携踏殘照村場酒薄亦有力把醖相娛不辭醺
眼花耳熱言語多霍然已醒如過燒人生百年會有盡
世事萬變誰能料酒空人散寂無聲為君試作蘇門嘯
茆亭

讀罷楞伽四卷經其餘終日坐茆亭靜聽溪碓春雲母
細斲松根采茯苓大道粗嘗聞海若高情未至媿山靈

寒泉新渌甘于乳晨起何妨挈半瓶

身世

身世飄然似斷雲時人誤許與斯文
旋償碑債動千里強理詩情無一分子
美舊悲殘酒炙幼安今老白襦裙
餘生自喜渾無事清夜銅爐炷寶熏

家有兩瓢分貯酒藥出則使一童負之戲賦五字句

長物消磨盡猶存兩大瓢藥能扶困憊酒可沃枯焦童

負來山店人看度野橋畫工殊好事傳寫入生綃

禹寺

禹寺荒殘鐘鼓在我來又見物華新紹興年上曾題壁
觀者多疑自古人

旅遊

壯志蹉跎雪滿頭久將餘日付滄洲閒雲不入老人夢
隣笛似知孤客愁小築聊須傍蘭渚片帆那復到樟樓
生涯草草真堪笑三十年來一破裘

又

本自無心落市朝不妨隨處狎漁樵
螺青點出莫山色石綠染成春浦潮
縣驛下時人語鬧寺樓倚處客魂消
流年不貸君知否素扇團團又可搖

貧歎

貧到今年極蕭然四壁家弊袍生蟣
蝨粗飯雜泥沙浩浩乾坤大茫茫歲
月賒故鄉煙水窟別擬卜生涯

東窓

九折危途寸步難
至今回首尚心寒
元來自有安身處
茆屋三間似海寬

又

才薄常為世俗輕
還山力不給躬耕
即今贏得都無事
袖手東窓聽雨聲

又

俗世紛紛意不攄
兀如頭垢念爬梳
東窓且復焚香坐
閒看微雲自卷舒

又

寂寂東窓午夢殘更堪春雨作春寒
蠻童未報煎茶熟一卷南華枕上看

近村

家居每思出出亦無與遊江山豈不佳
乃復生我愁不如適近村家家業農疇
深巷鳴雞犬長陂下牛羊牛棗熟稻當
穫桑落酒可藹寧無賓祭須柿栗良易求
醫翁日過門得藥疾自瘳婚嫁不出村
百世加綢繆我來每絕

卷之十五
歎恨不終歲留人生正應爾底事須王侯

石帆山下作

石帆山下古苔磯回首人間萬事非
能飲上池何患死
不營尺宅欲安歸
寒龜瑟縮捲床老
倦鶴翩遷帶箭飛
堪笑年來殊省事
就憑樵女綻春衣

旦起

殘燈冷火待窓明
稍覺今朝病體輕
已賴林鳩知宿雨
更煩簷鵲報新晴

又

地爐晨起撥寒灰困睫濛濛尚嬾開正倚蒲團覓殘夢
一聲啼鳥又驚回

書況

自從請老鏡湖濱萬事不關林下人鴉去鴉歸還過日
花開花落又經春官微也過千重浪身在依然一幅巾
晨突有煙吾事了濁醪不復惱比鄰

閑中戲賦村落景物

遊宦才能薄還山日月長買牛捐寶劍取酒解金章泉
脉疏供啜松肪煉按方北窗貪兀傲南陌喜彷徨僧過
傳著法醫來寄藥囊泛舟經姥廟策蹇上滄塘嬾似嵇
中散癡如顧長康人間須埽迹隨處是羊腸

姥廟滄塘
皆湖上地

名

又

覆篠初成屋編荆旋作門孤雲生釣瀨微雨過棊軒柳
種來傍縣

族子為取柳本
于餘姚茅氏

花栽乞近村石欹聊可坐地

編不成園酒榼剗楓癭香爐斷竹根海鷗呼可下隴鳥
教能言搏飯迎雙鶴聯緇繫小猿山家雖寂莫隨事有
盤飧

予好把酒常以小戶為苦戲述

我非惡旨酒好飲而不能方其臨觴時直欲舉斗升若
有物制之合卺已不勝豈獨觀者笑心亦甚自憎正如
疾逆虜憤切常橫膺蹭蹬忽衰老何由効先登上天無
長梯繫日無長繩可歎固非一壯志空飛騰

春日對花有感

天天枝頭花鬱鬱地上草方春萬物遂我乃獨衰稿少
時喜方藥晚亦學黃老又非愛名宦壯歲迹已埽如何
過八十尚復未聞道偃行阡陌間齒搖而髮縞名山可
巢居決去恨不早宴坐精思牀猶能養梨棗

出遊遇雨而返

柴門方出雨霏霏未到湖邊促駕歸深炷爐香掩屏臥
誰知不為濕春衣

又

荒山前頭野水邊東行西行不自憐天公豈亦哀老子
風雨畱教終日眠

記閒

白雲堆裏看青山猿鳥為隣日往還黃綺後身應我是
再來依舊一生閒

二感

狸奴睡被中鼠橫若不聞殘我架上書禍乃及斯文乾

鵲下屋簷鳴噪不待晨但爲得食計何曾問行人情得
暝而安飢得飽而馴汝計則善矣我憂難具陳

題柴言山水

陰陰山木合幽處著柴荆喧中有靜意水車終日鳴春

又

懸水三十仞疾雷聞數里正暑凜生秋倚杖者誰子夏

又

高秋風雨天幽居詩酒地君看此氣象其可折簡致秋

又

草亭臨峭絕霜嶂起嶙峋危磴儻可上老夫思卜鄰冬

草亭獨坐

埽地垂簾坐草亭東風吹頰醉初醒睡蛇死後魔無力
疾豎降來藥有靈在手殘梅香淡泊傍檐幽鳥語丁寧
老人不是神通妙世事元來要飽經

修居室賦詩自警

花園二三畝敗屋八九間初至如逆旅忽逾四十年屋

日已朽蠹我老不自還茅可刈之野木可伐之山尚復
不能具日夜憂其顛況我虛幻身念念隨化遷齒墮髮
亦縞鏡中失朱顏其危甚于屋何恃能牢堅豐汝梨與
棗養汝汞與鉛防疾如待敵愛氣如守關謀于履霜初
懼在橫流前書紳銘席端雖老尚可全

遜迹

遜迹荒村慣忍貧秋毫不使喪其真家居亦以古為鑑
事過始知天勝人臨食致思方下箸讀書有得每書紳

放翁耄矣當知幸布褐藜羹畢此身

春晴登小臺

不管筇枝破綠苔閒穿萬竹上荒臺
幽花經雨自開落啼鳥喜晴時去來
河岸家家裝彩舫兒曹處處唱青梅
誰知老子癡頑甚看改新元十一回

魯墟舟中作

春浦南來元不到画橈偶復入鷗羣
人家遠火林間見船底微波枕上聞
山口正街初出月渡頭未散欲歸雲

錦囊詩草新寥落得句猶堪寄一欣

貧病戲書

得米還憂無束薪今年真欲甑生塵
椎奴跣婢皆辭去始覺盧仝未苦貧

又

頭痛泔泔齒動搖醫驕折簡不能招
亦知客疾無根柢少健還能起負樵

又作二首自解

盡日溪邊艇子斜
治生不種邵平瓜
已分鄰舍紅蓮米
更啜僧房紫筍茶

又

靈府安平四體和
經時止酒頰常酡
老生要是常談爾
吐納餘閒即按摩

挾書一卷至湖上
戲作

買地孤村結草廬
蕭然身世落樵漁
一編在手君無怪
曾典蓬山四庫書

謝客相過

我力日愈衰人事不敢倡窮巷春多泥何以稅客鞅諸君顧何取勤懃問亡恙賦詩代尺書跂望徒悵悵

書幸

土盎常餘菜山庖不絕煙罷醫翻少疾無術自長年小舫煙波宅閒身陸地仙東窓最佳處日對坐忘編

書歎

鬚髥承學紹興前歷看人間七十年撲滿終歸棄道側

鷓鴣猶得載車邊
釣舫夜泛吳江月
醉眼秋看楚澤天
造物未容書鬼錄
殘春又藉落花眠

古興二首各五韻

草衰何預人
每起徂年悲
日月纔幾何
又見青青時
青雖滿眼行
矣當復衰
盛衰還無端
其理可前知
人生死則已
千載無還期

又

月出橫林上
宿鳥無定枝
物生各畏禍
所託輒蹈危
老

人倚壁坐大斲驚羣兒雖云差自適見事亦太遲猶有一可喜永謝世俗羈

病中有述二首各五韻

萬事有常理中智皆能知禍福如白黑不待諏蓍龜疾患初萌芽未有旦夕危每能自省察百拙安能窺一怠生百疾速死乃自詒

又

為國恃久安變起最莫測釋楚為外懼此實計之得吾

儕學養生事事當自克老無聲色娛戒懼在飲食要須
銘盤盂下箸如對敵

黃鵠吟

嗟哉黃鵠一何陋性喜隱翳藏荒園煙深翅重飛不起
鳴聲穀穀知雨候夜與妖鵲羣又似惡白晝羽毛不足
辱彈射滋味不足登俎豆捕之既無用鬻之又不售譬
之人以支離而全木以擁腫而壽若予者智不能知農
圃學不能舉孝秀名不譁世動得嘲詬是亦天下不材

之尤尚何議乎汝後

恩封渭南伯唐詩人趙嘏為渭南尉當時謂之趙渭南後來將以予為陸渭南乎戲作長句

老向人間久倦遊君恩乞與渭川秋虛名定作陳驚坐
好句真慙趙倚樓棧豆十年霑病馬煙波萬里著浮鷗
就封他日輕裘去應過三峰處處留

幽居

宿志在人事清心游物初猶輕天上福那習世間書薺

菜挑供薺槐芽采作蔬朝脯兩摩腹未可笑幽居

肩輿至湖桑埭

籃輿隨意出衙門日已沉山野未昏小市叢祠湖上路
短垣高柳埭西村麥苗極目無閒土塘水平堤失舊痕
明詔裕民聞屢下老農何以報君恩

半俸自戊辰二月置不復言作絕句

力請還山又幾年何功月費水衡錢君恩深厚猶慙懼
敢向他人更乞憐

又

俸券新同廢紙收
迎賓僅有一絕裘
日鋤幽圃君無笑
猶勝牆東學儂牛

頭風戲作

出門處處皆桃李
我獨呻吟一室中
只道有詩成瘧鬼
誰知無檄愈頭風

茅齋

茅齋雖絕小老子策新勛
磴落霏霏雪爐生裊裊雲
心

將鷗共遠巢與鶴中分幾許人間事吾廬寂不聞

畊桑

老病雖俱至畊桑亦未遲兒童誇犢健婦女閔蠶饑月
落梟鳴夜殘燈鼠齧時但當尋熟睡萬事不須思

春遊

方舟衝破湖波綠聯騎蹋殘花徑紅七十年間人換盡
放翁依舊醉春風

予年十四始到禹祠
龍瑞今七十一年矣

又

熟食從來少天色東吳況是足春寒城南藉草可痛飲
安得酒腸如海寬

又

蘭亭路上換春衣梅市橋邊送夕暉聞有水仙翁是否
輕舟如葉漿如飛

又

沈家園裏花如錦半是當年識放翁也信美人終作土
不堪幽夢大匆匆

蔬飯

春事已闌珊山村未褪寒筍生初入饌薺老尚登槃僧
飯時分鉢園蔬不仰官枯腸更禁攪始置密雲團

海棠歌

我初入蜀鬢未霜南充樊亭看海棠當時已謂目未覩
豈知更有碧雞坊碧雞難海棠天下絕枝枝似染猩猩血
蜀姬豔粧肯讓人花前頻覺無顏色扁舟東下八十里
桃李真成僕奴爾若使海棠根可移揚州芍藥應羞死

風雨春殘杜鵑哭
夜夜寒衾夢還蜀
何從乞得不死方
更看千年未為足

園中作

湖曲舊誅茅松陰近結巢
安閒多熟睡衰退少新交
雨漬丁香結春生豆蔻梢
良辰不把酒新燕解相嘲

書意

整書拂几當閒嬉
時取曾孫竹馬騎
故故小勞君會否
戶樞流水即吾師

又

人生祇要常無事
忿欲紛紛喜見侵
贈子秘傳安樂法
秋毫莫遣動吾心

又

籬角緋桃落漸稀
晚風吹去點苔磯
揮金豈必如疏傅
二畝春秧也是歸

晚春

世事紛紛不足論
流年去似海濤翻
莫因齒髮悲殘景

且喜柴荆是故園千里桑麻無曠土數家雞犬自成村
鄰翁過我誇秧信雨後春泥一尺渾

又

莫笑花前醉墮巾放翁又看一年春尋巢燕熟頻穿戶
釀蜜蜂喧不避人楚廟羔豚初散社稽山筍蕨正嘗新
要知不負年光處南陌東阡自在身

劍南詩彙卷七十五

欽定四庫全書

集部

劔南詩藁卷七十六

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劍南詩稿卷七十六

宋 陸游 撰

湖上

綸巾羽扇影翩翩湖上徜徉莫計年
桃李已忘疇昔分禽魚猶結後來緣
山前虛市初多筍江外人家不禁煙
莫恨幽情無與共一雙白鷺導吾前

即事

成敗歸青史悲驩付浩歌病從今歲減詩比去春多高
枕觀浮世持盃養太和功名亦易爾難負此漁簑

東籬雜書

芳草初侵路青梅已破枝雨來鳩逐婦日出雉求雌
林江湖遠悠悠歲月移老人觀物化隱几獨多時

又

桃李成塵土來禽始著花病夫猶枕上春事又天涯
蒼陌鞦韆夢簾櫳燕子家野僧來問訊強把半甌茶

又

老厭人間事，閒知造物功。
草生三徑綠，花發一窗紅。
幽境囂塵外，流年嘯傲中。
所嗟儕輩盡，論舊只春風。

又

身與春俱老，愁隨日漸長。
簾櫳聽語燕，澗谷擷幽芳。
酒榼常從後，詩囊亦在傍。
閒行無定處，隨意據胡床。

山行

山鳥啼孤戍，煙蕪入廢亭。
隄成陂水白，雨細稻秧青。
草

市少行旅，鼓祠多乞靈。最憐投宿處，微火莫晶熒。

稻陂

白水滿稻陂，投種未三宿。新秧出水面，已作纖纖綠。年來殘俸絕，所望在一熟。見之喜欲舞，不復憂半菽。想當西成時，載重壓車軸。病齒幸已牢，往矣分社肉。

雨夜思子虞

兀兀過遙夜，悠悠擁破衾。峭寒侵病骨，殘雨滴愁心。人別易，千里書來真萬金。醉眠差似可，誰與伴孤斟。

醉中示客

四座無譁聽我歌
百年生計一煙蓑
清尊潏潏猶狂在
白髮蕭蕭奈老何
遠適安能縮地脉
高眠聊足養天和
吾徒看盡人間事
莫愛車前印幾窠

散髮

散髮垂肩嬾更簪
一窗水竹對蕭森
從來恥作資身策
老去終懷報國心
雷起鼻端秋枕石
泉鳴指下夜橫琴
不緣羸病愁迎客
經歲何人肯見臨

病中觀辛夷花

餘生垂九十一病理一哀旬月不自保敢作期歲期
槃女即花忽滿庭前枝繁華雖少減高雅亦足奇特
盃酌花前事亦未可知明年儻未死一笑當解頤

小艇

放翁小艇輕如葉只載蓑衣不載家清曉長歌何處去
武陵溪上看桃花

雜題

賀公在朝雅吳語莊烏仕楚猶越吟我幸歸休在閭巷
燈前感慨不須深

又

茆屋三間已太奢柴乾米白喜無涯非賢敢竊優賢祿

願折蓴絲與蕨芽

半俸自春初
不復敢請

又

野花紅碧自爭春村酒酸甜也醉人解放船頭便千里
不愁無處著閒身

又

湖隄疎瘦水楊柳村舍殷紅山石榴推戶本來隨意入
乞漿因得片時留

閒遊

柴車去去度橫陂正是春殘入夏時果熟多藏新密葉
鶯啼偏占最高枝迷途每就傭畊問薄飯時從逆旅炊
隨意題詩無傑思還家猶足詫吾兒

病起初夏

頭風間作已全輕
山雨雖頻却快晴
窗外時時度花片
林梢處處送鶯聲
地偏無客談間事
麥熟逢人樂太平
不為哀遲辜節物
一甌羊酪薦朱櫻

衡門獨立

春歸堪笑又怱怱
水白秧青細雨濛
溪鳥低飛畫橋外
路人相值綠陰中
宋清藥券貧來積
李賀詩囊病後空
惟有劇談能一洗
芳尊那得故人同

雨夜

吳中地多雨海角客常愁羸疾須醫藥殘年憶輩流
解裝孤驛晚振柁小江秋莫起瀟湘興無才賦遠遊

山麓

草合路如線偶隨樵子行林間遇磐石少憩看春畊

北坐

質衣葺北坐欹壞略撐拄窗扉則虛名聊足度寒暑獨
學無與論推覈實勞苦審觀古人意十亦得四五無功
與子光相可豈待語一床寬有餘高臥聽簷雨

禽言

架犁架犁南村北村雨淒淒夜起飯牛雞未啼日莫矧
矧行千畦沒足勿恨一尺泥西成收薄汝噬臍架犁

又

拔筍拔筍入箐不辭風雨窘養成會見高拂雲取供口
腹初不忍獨持兩把慰倚門慈顏一笑如春溫拔筍

又

老翁老尚健打麥持作飯終歲隴畝間勞苦孰敢怨人

生為農最可願得飽正如持左券碓春樵爨小甑香豈

不勝汝耗太倉

打麥作飯

又

堂前捉績子力作忘朝餐鵝黃雪白相照耀揀茅作簇

高如山蠶女採桑至煮繭何暇膏沐梳髻鬟繅成蜀錦

與楚穀舞妹纏頭不論束

堂前捉績子

道院偶述

景德祥符草野臣登封曾望屬車塵已經成住壞空劫

猶是東西南北人

又

憶在青城煉大丹丹成垂欲上仙班飄零未忍塵中老
猶待時平隱華山

初夏書感

春與人俱老花隨夢已空
遊蜂黏落蕊輕燕接飛蟲
桑梓知蚕起牲肥賽麥豐
為農當自力相戒勿怱怱

贈邢窮甫

割愁何處有并刀傾座誰能奪錦袍堪笑陸翁隣鬼錄
尚推邢友擅人豪杜門雖少客載酒落筆已能奴命騷
安得相從北窗下丐君牘馥與殘膏

昔從戎南鄭日范西叔為予書小臥屏今三十有
八年矣悵然有懷

梁州風月今何在每憶朋儔淚濺裾戎幙已如它世事
素屏猶對故人書

小雨

川雲疊疊密如鱗
山雨霏霏細似塵
未必便為畊隴喜
天公分付與詩人

遣興

山澤荒寒外
門庭寂寞中
厭聞鳩喚雨
常羨鵲知風
逆境嗟行徧
閒愁幸埽空
今晨有奇事
簫鼓賽年豐

又

風月資吟嘯
漁樵約往還
貧猶能釀酒
病不廢遊山
亂石臥牛馬
流泉鳴珮環
豁除羈旅日
猶有半生閒

初夏喜事

箕頰元非爭奪場
瀟湘自古水雲鄉
采茶歌裏春光老
煮繭香中夏景長
斂版早知遊宦惡
署門晚悟世情常
茹芝却粒雖無術
散髮猶當効楚狂

夢蜀

自計前生定蜀人
錦官來往九經春
堆盤丙穴魚腴美
下箸峨嵋楫脯珍
聯騎雋遊非復昔
數編殘藁尚如新
最憐栩栩西窗夢
路入青衣不問津

閒遊

一見溪山病眼開
青鞵處處蹋蒼苔
平生長物埽除盡
猶帶筆床茶竈來

又

好事湖邊賣酒家
杖頭錢盡慣曾賒
壚邊爛醉眠經日
開過紅薇一架花

初夏

床有蒲團坐負牆
室無童子自燒香
人圖作佛雖堪笑

我愛逃禪亦太狂
櫻筍久忘晨入省
蓴鱸猶喜老還鄉
汗青未絕茶經筆
那暇投文吊戰場

又

梅子生仁已帶酸
練花墮地尚微寒
室無長物惟空榻
頭不加巾但小冠
蠶簇倚牆絲盡起
稻秧經雨水陂寬
郊原清潤身差健
剝欲閒遊一跨鞍

野興

東望城闌十里遙
野人生計日蕭條
碁枰棄置機心息

肉食蠲除業境消
送藥時時過鄰父
放魚日日度溪橋
自憐愛物還成癖
門巷春來草沒腰

又

涉澗穿林信意行
翠崖朱棧愜幽情
關關幽鳥將雛語
簌簌幽篁解籜聲
籍草一壺消永日
出門幾屐了平生
川雲正作遮山計
浩蕩南風又快晴

自笑

宦途昔似伏轅駒
退處今如縱壺魚
手自埽除松菊徑

身常枕籍老莊書
郊居本自依農圃
社飲何妨逐里閭
白髮蕭然還自笑
風流猶見過江初

喜晴

正厭鳩呼雨
俄聞鵲噪晴
路開知潦退
書展喜窗明
日透疎簾影
風傳莫角聲
兒童競相報
門有賣朱櫻

過鄰曲

黃雲卷盡綠針齊
夏木陰陰滿古堤
耆老往來無負戴
比鄰問道有提攜
暑天漸近便餐酪
吳俗相傳尚鱸膾

共喜豐年多樂事扶歸先判醉如泥

題蘇虞叟巖壑隱居

蘇子飄然古勝流平生高興在滄洲
千巖萬壑舊卜築一馬二僮時出遊
香斷鐘殘僧閣晚鯨吞鼉作海天秋
極知處處多奇語肯草吳牋寄我不

縱筆

騎鶴翩翩過月傍浩然風露九秋涼
忽聞捲地潮聲起始覺江山近故鄉

又

百尺松根結茯苓十年長養似人形誰知金鼎烹初熟
恰直山翁醉欲醒

北窗即事

衡茅隨力葺幽居埽地焚香樂有餘分食時能下檐鵲
作洲常悔誑池魚遊歸又失相尋客睡起重開未了書
袖手悠然便終日不辭世俗笑迂疎

又

北窗寂與嬾相宜世上紛紛了不知露井甘寒初浚後
小山蔥蒨乍晴時粗餐豈復須鮭菜蓬戶何曾設屨屨
幸有床頭藤杖在登臨未遽歎吾衰

感物

提壺勸客飲架犁課農畊鳩方喜婦還蟻又以族行大
化職雨暘我窗更晦明芸芸觀萬物一笑了此生

園中把酒示鄰曲

畏途半世困風波老返家山得已多野餉雖無食指動

村醕也解醉顏酡夢殘正欲還君枕棊罷那知爛客柯
松菊未荒風月在應容老子且婆娑

又

煮豆烹蔬當果穀固應盃酌盡陶匏池塘潏潏荷浮葉
門巷陰陰筍放梢三畝荒園存故業一編蠹簡得深交
弊廬經雨穿將徧欲向村東自割茅

書憂

時人應怪我何求白盡從來未白頭
磅礴崑崙三萬里

不知何地可羶憂

門外獨立

朝看出市莫看歸數盡行人尚倚扉
要見先生無盡興
少須高樹挂殘暉

感事六言

老去轉無飽計醉來暫豁憂端
雙鬢多年作雪寸心至
死無丹

又

黑犢養來純白睡蛇死後安眠但有漉離可賣不妨到處隨緣

又

五尺童知大義三家市有公言但使一眠得熟自餘萬事寧論

又

麥熟與人同喜兵驕為國私憂身似五更春夢家如一

宿山郵

又

早歲已歸南陌莫年常在東籬短衣幸能掩脰長劒何

須挂頤

又

高岸眼看為谷寸根手種成陰一卷楚騷細讀數行晉

帖閒臨

又

李白嶽崎歷落嵒康潦倒粗疎生世當行所樂巢山喜

遂吾初

又

有飯那思肉味安居敢厭茅茨未論顏淵陋巷老農自
是吾師

幽居記今昔事十首以詩書從宿好林園無俗情
為韻

總角入家塾學經至幽詩治道本畊桑此理在不疑今
茲垂九十謝事居海涯戴星理農業未歎筋力衰四月

築麥場五月瀟稻陂秉火去螟蝗磨刀剪棘茨西成大
作社歌鼓樂聖時

又

上世本為農輟耕業詩書我少學不成固應返其初冥
冥不自揣鄉校參羣居中歲偶拔擢清班久超超典奏
入南宮細書長石渠及其乞身歸舊業已丘墟哀疾或
小間力尚給荷鋤寄聲謝故人毋為笑迂疎

又

我昔揮短楫終年釣吳松亦嘗攜長鏡采藥玉霄峰為
計晚大繆朝路偶見容晨趨大明班夜聽長樂鐘白髮
迫歸休居然鮮歡棕上恩許乞骸一日收孤蹤蓬茅略
補葺甌碓勤炊春故交零落盡歲晚當誰從

又

還鄉老未死舉目少耆宿邑屋亦或非所餘但喬木叢
時列鼎家今不飽半菽盛衰迭變遷何者非陵谷羸然
九十翁世故見已熟偶能達一理萬事等破竹布縫一

稱衣藜煮半釜粥餘年更何為枕藉糟與麴

又

癸亥辭脩門拜賜散人號一出非本心歡喜歸祭竈故
鄉多名山幸得遂所好舟興雖難具信步亦可到清溪
無塵滓奇峯有雲冒雨墊林宗巾風落孟嘉帽豈惟狂
故在望遠亦未眊一醉儻可謀敢受將軍告

又

入蜀過匡廬秋風宿東林月出斷山口滿窗松竹陰裊

裊一枝燭道人語夜深亦設麴果供慰此羈旅心猶恨
非遠公無酒遣我斟明日下山去歎息歎重尋回首四
十年駒隙何駸駸舊遊不可到悵望空長吟

又

昔戍西郵時憑高望中原願欲棄天風往吊綺與園有
志莫能遂悵望商山魂遙想山中人歲時奠芳蓀夕陽
簫鼓散高柳擁廟門老來更事多考古見本根乃知當
時事禍福未易言千載信悠悠浩歎掩綠尊

又

客舟挂煙帆千里過楚都七澤渺無際大不數具區浪
翻出長蛟雲折浮天吳我我來如山碎船不須更江行
幸已盡三峽尤畏途槎牙人鯁寃小失即見屠叩頭禱
鬼神已脫猶號呼願君勤自勵憂患何時無

又

昔自京口歸卜居得剡曲地偏無市人民淳有古俗陋
屋僅結茆粗飯財脫粟典衣以沽酒九月未能贖寧負

翁子薪恥售卞和玉老身已如此兒子亦碌碌藏書幸
無恙自計不啻足拾穗且浩歌行矣墮鬼錄

又

少小喜讀書終夜守短檠其實無甚解不幸誤有聲勞
苦亦何得空失東臯畔莫年乃小黠告歸學養生采藥
作遠遊把釣適幽情高樓笛數曲小軒棊一枰餘年置
勿憂不卿何由烹

喜雨

入夏久不雨旱勢已岌岌蛙蛤徒自喧蛟龍臥如蟄何
由白水滿但守青秧泣上天忽悔禍川雲起呼吸虛簷
雨競瀉平野苗盡立兒停跣溝車婦免憂谷汲人言雨
非雨乃是傾玉粒移床亦細事敢嘆屋漏溼

初夏雜興

老子今朝不用扶雨涼百病一時蘇扇題杜牧故國賦
屏對王維初雪圖把釣溪頭跣湍瀨煎茶林下置風爐
箇中莫謂無同賞逋客能從折簡呼

又

巾脫冠欹八尺床竹陰槐影有餘涼
隨風花墮殘棋上
引睡書拋倦枕傍
水長沙鷗向人熟
雨餘巢燕哺雛忙
尚嫌未愜幽情在
又喚漁舟渡野塘

又

自斷殘年莫問天
吾儕何處不隨緣
家貧却得身差健
夜短何妨晝熟眠
未歷名山采靈藥
且從同社樂豐年
賣絲糶麥償逋負
猶有餘錢買釣船

又

繆算狂言悔莫追
杜門省事不妨奇
欹傾淡墨詩成後
縹緲烏巾浴出時
筇杖閒行穿密篠
繩床移坐照清漪
眼邊好景真須惜
漸近浮生結局時

又

趁雨東園去荷鋤
歸菴却展讀殘書
幸能冒著雲夢澤
何恨家無擔石儲
水泛時須借篷艇
山行亦或命巾車
嬾心惟怕遊城市
非向交親故作疎

又

終日頽然蠹簡中
門前煙水浩無窮
百年等是一枯塚
四海應無兩放翁
栗玉長枝挑苦筍
胭脂小把翦防風
地偏日永閒無事
擬著珍蔬譜一通

對酒作

飲酒豪如卷白波
遣愁難似塞黃河
多聞只解為身累
後死空令見事多
未試神仙餐玉法
且膺壯士入關歌
此心不道無人識
雪鬢蕭蕭奈老何

獨坐閒詠

書生亦有功名願與世無緣每背馳一寸丹心空許國
滿頭白髮却緣詩

又

深掩柴荆謝世紛南山時看起孤雲殘年所幸身猶健
閒事惟求耳不聞

水亭

水亭不受俗塵侵葛帳筠床弄素琴一片風光誰畫得

紅蜻蜓點綠荷心

又

莫道山翁老病侵靜中理得舊傳琴朝來有喜君知否
雨展芭蕉二尺心

書興

占得溪山卜數椽飽經世故氣猶全入門明月真堪友
滿榻清風不用錢便死也勝千百輩少留更過二三年
湖橋有酒能來醉一棹何妨作水仙

書感

翟公冷落客散去蕭尹譴死人所憐輸與桐君山下叟
一生散髮醉江天

又

驅山不障東逝波一尊莫惜醉顏酡斜風細雨茗溪路
我是後身張志和

暑雨

欲雨未雨雲車奔欲睡不睡人思昏蠻童正報煮茶熟

忽有野僧來叩門

又

草茂水長蛙羣鳴
涯深路壞人斷行
故侯老退守瓜壟
翠蔓黃花徧眼明

池亭夏晝

造物寧非念老生
池亭幽事悉施行
羣魚聚散忽無迹
孤蝶去來如有情
小榼落茶紛雪片
寒泉得火作松聲
曲肱假寐脩然寤
不為敲門夢不成

又

茅舍蘆藩枕小灘
蕭森那復畏炎官
醉床酒解香初過
嬾架書橫夢未殘
饒愛流匙孤米滑
渴便滿杓粟漿酸
兒孫幸有團圞樂
未覺浮生一笑難

頃歲從南鄭
屢往來興鳳間
暇日追懷舊遊
有賦
昔戍蚕叢北
頻行鳳集南
峰傳戎壘密
驛遠客程貪
春盡花猶坼
雲低雨半含
種畬多菽粟
藝木雜松栟
婦汲
惟陶器
民居半草菴
風煙迷棧閣
雷霆起秋潭
城郭秦

風近村墟蜀語參快心逢曠野刮目望浮嵐考古時興
感無詩日每慙嘉陵最堪憶迎馬柳毵毵

埽除小園未竟歸臥

竹葉埽仍落莎根鋤更生陰陽常代謝今昔各施行勛
業須時至哀榮忌力爭徑歸差省事高枕聽蟬聲

暑中北窗晝臥有作

禦疾如治河但當導之東下流既有歸自然行地中養
生如藝木培植要得宜常使無天傷自有千雲時我少

本多疾屢亦頻危殆皇天實相之警告意有在中年棄
嗜慾晚歲節飲食中堅却外慕魔盛有定力死生雖天
命人事常相參茫茫九衢中百禍起一貪郊虛暑雨餘
巾墮脚不襪高臥北窗涼超然寄疎豁

羈懷

羈懷不復耐悲歡清鏡朝朝雪鬢繁謝傳畏逢親友別
龐公思遺子孫安殘骸累歲歸民伍半俸今春上縣官
閉戶惟須學堅坐不知更敗幾蒲團

自貽

寒暑衣一襦朝哺飯數匙錢能禍撲滿酒不負鴟夷

又

家風本韋布生事但漁樵慣就下鄉食莫煩東閣招

又

癡孫護雀雛饒僕放池魚懷樂間鄰疾典衣收舊書

又

退士憤驕敵閒人憂早年耄期身未病貧困氣猶全

劔南詩豪卷七十六

欽定四庫全書

劔南詩藁卷七十七

宋 陸游 撰

得雨霑足遂有豐年意欣然口占

人事銷沉渺莽中此身元合付天公
儒生可逐惟求志社酒常辭不怕龍
鬱鬱稻苗欣出穗汪汪陂水告成功
老民莫道渾無用能為明時祝歲豐

浴罷閒步門外而歸

雨扇荆扉數掩籬幽人浴罷得娛嬉南臨大澤風來遠
東限連山月出遲沙上無泥藤屨健水邊弄影葛巾欹
徑歸却就東窗臥要及蟬聲未歇時

初晴

暑雨初收體為輕遠山盡出眼偏明詩憑寫興忘工拙
酒取澆愁任濁清綠樹有陰休倦步澄溪無滓濯塵纓
老人本少凋年感不奈江城暮角聲

枕上

青絲玉井轆轤聲露葉風枝鶻鴂鳴造物未容閒到死
又從枕上得詩情

又

冥冥梅雨暗江天汗浹衣裳失夜眠商略明朝當少霽

南簷風珮已鏘然

新作樂玉風簷如古
玉珮玕瑯瑤瑟備

讀史

馬周浪迹新豐市阮籍興懷廣武城用捨雖殊才氣似
不妨也是一書生

今歲六月望後一日立秋比常年涼意差早

九衢車馬困炎曦正是山中散髮時
秋近梧桐已搖落陰生蟋蟀最先知
稻陂水白寧憂旱灶突煙青幸續炊
誰謂吾廬太岑寂茶瓜亦有野人期

獨坐

蛙鳴乃是怒鵲嘯固非妖獨宿空山夜何妨伴寂寥

又

輕雷不成雨闕月却穿雲獨倚南魚柱長吟到夜分

貧病

貧至今年劇真無地置
錐判愁停貰酒忍病罷迎醫
性嬾非關老天窮豈坐詩秋
風還欲到便可數期頤

涉溪

揮汗欲成雨聚蟲真若雷
山翁在何許赤脚步溪來

即事

身向人間閱事多杜門聊得養
天和盛衰莫問蕭京兆
壯老空悲馬伏波日莫城樓傳
戍角風生嶺路下樵歌

君知此段神通否豎拂能降百萬魔

又

唐虞千載仰巍巍太息儒生每背馳經未盡亡君更考
古無不死我何悲釣耕本是求賢地宵旰今逢願治時
寄謝公卿各努力為吾君築太平基

又

我愛湖山清絕地抱琴携鷗往茆堂藥苗自采盤蔬美
菰米新春鉢飯香南浦風煙無限好北軒雷雨不勝涼

舊交散落無消息借問黃塵有底忙

又

放翁老去未忘情鏡裏森然白髮生一片常愁見花落
三聲最怕聽猿鳴年年雙隻路傍堠夜夜短長城上更
晚悟一條差似可孤舟漁火看潮平

野性

野性從來與世疎俗塵自不到吾廬醉中往往得新句
夢裏時時見異書稚子那偷服藥酒家僮尚護放生魚

今朝更有欣然處引得清泉灌晚蔬

間行

出戶莽悠悠東西本不謀阻溪因小涉逢店得中休鳥
沒千山暝蟬吟一院秋詩成還自笑信筆媿冥搜

伏中熱不可過中夜起坐作詩寄五郎

衆星若銀磔老桂臥海底中夜熱不解病叟推枕起悲
蟲號草根孤螢照野水樹頭風急生喘汗真一洗追憶
總角初學古頗自喜祝身願耆老常恐抱志死豈知才

術疎空自凋髮齒功名永無期祿不飽妻子歸耕力又
憊得粟半糠粃詩書不可賴如倚折足几大兒逾六十
逐食走千里路途況難梗累月書一紙豈不念歸省屢
請輒見祝幸吾未極哀汝行姑少止

暑中自遣

名山處處得幽尋破硯時時出苦吟上藥和平無近効
古詩簡淡有遺音蘇門隱去聞孤嘯栗里歸來弄素琴
尚恐俗塵除未盡每思雪夜宿東林

夜坐中庭

蕭散坐中庭三更月未生
朔風涼醉頰汲井濯塵纓
草露沾衣冷天河隔樹明
裴回不能睡鼓角下高城

夜坐門外示子通

秋意遽如許體中殊未佳
灘深無宿鷺草茂有鳴蛙
棲趣從吾好吟哦與汝偕
雲門漸可到剡判幾青鞋

夜坐小飲

零落槐花已滿溝江湖又見一
番秋水輪有轍凌空上

銀漢無聲接地流
丹荔甘寒勞遠致
玉醅醇冽喜新篘
移床坐對西南電
好雨心知不待求

閒思

畢世為農不復疑
還東六見歲陰移
閑門旋了和詩債
賣藥不償沽酒資
意倦投床効龜息
齒疎嚼飯類牛呵
兀然過日君無怪
一念功名恐過悲

書村店壁

裹茶來就店家煎
手解驢鞍古柳邊
寺閣重重出山崦

漁舟兩兩破溪煙近秋漸動尋幽興絕俸難營覓醉錢
到處不妨閒著句他年好事或能傳

幽居

毒暑流金石吾廬乃爾幽松棚香帶露竹簟冷生秋盪
漿蘋花浦垂竿杜若洲非關遺世事聊以解吾愁

立秋前九日大雨涼甚

天暑正三伏雨來俄九秋寒聲入簷戶爽氣襲巾禡山
色凝深黛溪流戰怒虬身輕更何苦處處可閒遊

又

雨暗初疑暮雲開已變秋有風生枕簟無汗漬衣襟漉
酒嘗浮螳題詩走黑虬呼兒治書笈吾欲剡中遊

寄太湖隱者

青松伐作薪白玉碎作塵雖云質已毀見者猶悲辛磊
砢任棟梁溫潤中琮璧豈以捐空山遂比凡木石鄙生
吏高陽馬周客新豐從來豪傑士大指亦略同具區古
大澤煙水渺千里可望不可到中有隱君子圖書兼河

誰成毀窮乾坤有時跨蛟鯨指搗雷雨奔嗟我獨何人
乃許望顏色逝將從之遊變化那得測

讀史

湘帙牙籤滿架書流泉泱泱竹疎疎人生得志寧無命
一室何妨且埽除

又

王侯到底是虛名何物能為我重輕徒步出關胡不可
向來常笑棄儒生

又

男子胸中正要奇立談能立太平基君王玉鉞無窮恨
千載茫茫誰復知

又

自古功名亦偶諧胸中要使浩無涯可憐赫赫丹陽尹
數顆檳榔尚繫懷

病戒

憂身如憂國畏病如畏亂此身雖幸健敢作無事看禍

福在呼吸恐懼兼寢飯人所忽不省我思嘗熟爛夜臥
不安席晨起寧待旦雖云親藥石得失每參半人情喜
一快往往觸剝悍收功寧使遲覆敗不可玩

夏夜納涼

河漢微茫月漸低風聲正在草堂西
莎根唧唧蟲相吊木末翻翻鵲未栖
屯甲近聞如積水聞淮壩近募雄淮軍數萬守關

不假用丸泥孤臣報國嗟無地只有東臯更飽犁

銘座

身退仍懷退心平更欲平直嫌繩尚曲重覺昂猶輕力
學能除翳深居可息黥聖門初豈遠妙處在躬行

異夢

山中有異夢重鎧奮雕戈數水西通渭潼關北控河淒
涼鳴趙瑟慷慨和燕歌此事終當在無如老死何

初秋驟涼

我比嚴光勝一籌不教俗眼識羊裘滄波萬頃江潮晚
漁唱一聲天地秋飲酒何嘗能作病登樓是處可消憂

名山海內知何限，準擬從今更爛遊。

新涼

家住山陰剡曲傍，一番風雨送新涼。亦知病得清秋健，無奈愁隨獨夜長。日落川原橫慘淡，月明洲渚遠蒼茫。老民無復憂時意，齒豁頭童只自傷。

書幸

才薄無能役窮途，不意全得書娛晚。莫遇藥起沉縣漂，母能分食偷兒肯。恕瓊不知從此去，更度幾年。

獨遊

地僻少人迹身閒思獨遊
荒村更阻雨哀鬢不禁秋
斷續呼牛笛橫斜放鴨舟
殘年澹無事隨處送悠悠

記夢

夢遊異境不可識翠壁蒼崖立千尺
樓臺縹緲出其上揮手直登無羽翼
門楣扁榜作八分奇勁非復人間迹
主人鹿弁紫綺裘相見歡如在疇昔
探懷示我數紙書妙句玄言皆造極
我即鈔之雜行草主人憺恍如甚惜

夢中亦復知是夢意恐覺時無處覓自量強記可不忘雞
唱夢回空歎息

初秋自述

平生偶有愛山癖垂老常無沽酒資破屋頽垣吾已矣
大冠長劔汝為誰郵亭歷歷關河遠鬢髮蕭蕭歲月移
殘暑不禁隨手過東籬又近菊花時

秋暑夜起追涼

漱罷寒泉弄月明浩然風露欲三更曲闌干畔踟躕久

靜聽空廊絡緯聲

又

道士磯邊浪蹴天
郎官湖上月侵船
莫年自度無因到
且與沙鷗作後緣

小築

小築竝湖堤
茅茨不厭低
引泉澆藥圃
斫竹樹雞棲
霽山常淡秋
蕪路欲迷
平生草玄手
老去學鉏犁

喜雨

黑雲橫絕天漢津父老僉言候當雨未論秋稼縣十里
且喜滂沱洗殘暑我起呼兒扶再拜汗垢得涼真一快
桔槔抱甕兩置之日日齋盂飽菰芥

又

雨聲蕭蕭集庭樹雨氣森森入窗戶玉川茆屋久不葺
破漏無復施床處我於萬事本悠悠危坐讀書忘百憂
明朝秋水增三尺且復沙邊弄釣舟

秋夜

大枕空床夢不成
草堂悄悄四無聲
月明漸見天窗白
風起忽聞簷珮鳴
客子未忘悲故里
老人無念到浮名
江村歲歲先涼冷
且復尋盟向短檠

白鷗

平生崖異每自笑
一接俗人三袂除
惟有白鷗真我客
爾來底事向人疎

靜室

靜室牀橫一素琴
爾來殊覺道根深
喚回倦枕功名夢

洗盡浮生幻妄心
兩屨雲煙遊少室
一窗風雪宿東林
細思却是關身事
無奈殘年老病侵

秋興

秋眠怯葦冷晨飯喜蔬香
寧使衣百結肯儲錢一囊
杜門雖局促負氣尚軒昂
死去真無憾曾孫似我長

欲雨

徙穴中庭蟻爭巢後
團鳩物情猶慮患
人事得忘憂

又

荷鋤決新渠，芟茅補舊廬。共知秋必雨，有備即安居。

雜感十首以野曠沙岸淨天高秋月明為韻

呂釣渭水濱，說築傅巖野。雖曰古盛時，得士蓋亦寡。天將起治亂，人才有用舍。向非萬牛力，孰與成大廈。

又

洙泗日已遠，儒術日已喪。學者稱孔墨，為國雜伯王。書生幸有聞，力薄不能倡。默然世俗間，汝職無乃曠。

又

我昔下三峽百丈堆兩車初發公安城已過長風沙早
知世路惡恨不常浮家至今清夜夢雙鶻聞謳啞

又

斗杓運四序寒暑忽已換人生知幾何去日難把玩憑
高望煙海青山忽中斷秋風肺病蘇為子巾一岸

又

磨鏡要使明拭几要使淨奈何視吾心不若几與鏡垢
汙倘未除秋豪即為病吾曹亦聖徒可不學顏孟

又

天人本一理禍福常照然人衆何足恃妄謂能勝天適
燕當北轅調瑟當解弦五行未可忽洪範禹所傳

又

鏡湖一何清稽山一何高浙江百里遠夜枕聞驚濤子
胥死吳下千載無人豪遺魂招不來我欲續楚騷

又

歸耕無襜褕出戰無兜鍪已失西疇春空懷北平秋提

攜一束書踏蹬至白頭圃中有轆飯一飽吾何求

吳人謂飯

不炊者為轆飯轆音勞

又

我昔遊劔南爛醉平羗月一盃玻瓈春萬里望吳越豈知有天幸故山得歸骨扁舟小江上夜半看月沒

又

入東多名山天台連四明路窮寺門出林闕溪橋橫豈無一月間結束與子行會揀最幽處煨芋聽雪聲

秋思

秋雲易簇日常陰
西望山村每欲尋
屏掩數峰臨峭絕
蛇蟠一徑入幽深

又

山步溪橋入早秋
飄然無處不堪遊
僧廊偶為題詩入
魚市常因施藥留

又

臨海銅燈喜夜長
蘄春笛簟怨秋涼
世間生滅無窮境

盡付山房一炷香

台州白銅
燈紫絕妙

又

才不才間未必全胸中元自要超然黃金不博身強健
且醉江湖萬里天

又

牙齒漂浮欲半空此生已付有無中一盃蔡粥楓林下
時與鄰翁說歲豐

又

疏泉洗石誇身健
試墨燒香破日長
若得三山安樂法
不須更覓玉函方

又

傍縣人來涕泗翻
蝗災暴虎不堪言
天心似為哀翁地
飽食安眠獨北村

又

閒愁正可資詩酒
小疾安能減食眠
一畝旋租畦菜地
千錢新買釣魚船

又

眼明尚見蠅頭字暑退初親雁足燈歷歷胸中千載事
莫將輕比住菴僧

又

虛極靜篤道乃見仁至義盡餘何憂名山采藥恐未免
策蹇孰能從我遊

雞犬

鄉村年久競農務秋斂春畊恐失時我老元無夙興事

嬾雞啼曉恰相宜

又

貧家也復謹朝昏
小犬今年乞近村
糠粃無多深媿汝
猶猶終夜護籬門

秋來瘦甚而益健戲作

莫笑形羸不自支
清虛正與老人宜
茅頭浙米誰能食
甌裏生塵却自奇
獨釣又逢秋晚後
安眠常到日高時
邇來久雨牆垣壞
斫竹東岡自作籬

秋夜

岸幘蕭然病體輕
兩餘郊館已涼生
微風掠面酒無力
明月滿窗眠不成
葉底涓涓秋露滴
草根咽咽暗蛩鳴
屏居未免傷孤寂
賴有鄰翁約耦耕

秋興

巢燕無情不更回
門庭日日落楸槐
新涼漸喜償碑債
多病還憂欠藥材
社近家方第濁酒
客來身自掃蒼苔
道心已熟機心盡
寄語鸕鷀莫苦猜

閒詠

莫笑結廬魚稻鄉風流殊未減華堂茶分正焙新開茗
水挹中澗自候湯小几研朱晨點易重簾埽地晝焚香
個中富貴君知否不必金貂待紫皇

青城丈人祠畫仙
官有服貂蟬者

人壽至耄期

人壽至耄期如位至王公非以德將之往往不克終非
必皆大惡過取固多矣吾今垂九十追逐羣衆中筋骸
勝拜起耳目未盲聾强健天所借正與富貴同一念媿

屋漏一言誑孩童老無朋友規日夜勤自攻

訪野人

我行城西南適茲素秋時風露雖已高草木鬱未衰敲
門尋野人一笑萬事非拂榻意何勤酒醺雁鶩肥新涼
天所賜盡醉不足辭擊壤歌堯年瞑目以為期

黨蟲効宛陵先生體

澤國故多蟲森夜吁可怪舉扇不能却燔艾取一快不
如小忍之驅逐吾已隘寧聞大度士變色為蜂蠆

吹笛

吳江楚澤間遊偏未密平生萬里心
醉裏獨攜蒼玉筍
岳陽樓上作龍吟

書辛

破屋頽垣鬼笑窮暗中調護賴天公
頻年得疾身猶健
百種無營飯不空

感事

已醉猩猩猶愛屐入秋燕燕尚爭巢
老夫看盡人間事

欲向山僧學打包

晚晴

雨如塵點送新涼
雲作魚鱗襯夕陽
蓬戶清閒貧亦好
筍輿安穩病何傷

農家

寂寂江村數掩籬
吾廬又及素秋時
橫林未脫色已盡
孤鳥欲棲鳴更悲
小釜萸羹初下豉
矮瓶豆粉正燃箕
為農幸有家風在
百世相傳更勿疑

寓歎

白首還鄉厭歲薇
悵悵自歎欲疇依
門庭不埽稀迎客
礎杵無聲未贖衣
達士共知生是贅
古人嘗謂死為歸
畊疇幸可期中熟
又報殘蝗接翅飛

又

憶昔建炎南渡時
兵間脫死命如絲
奉親百口一身在
許國寸心孤劒知
坐有客瘡堪共醉
身今病忘莫求醫
出門但畏從人事
臨水登山却未衰

雨夜

病多漸減燈前課老甚都忘枕上愁一段高情誰會得
臥聽簷雨瀉清秋

秋懷

火食非初志衣塵每自哀危途觸澹瀕歸興薄蓬萊逋
客傳琴調高僧乞藥栽人間豈不好病眼自慵開

又

苦雨無時止幽人空復晴少眠知夜永久病喜秋清螢

傍疎簾度蛩依壞甃鳴流年那可挽又見曉窗明

又

獨立離人境幽居察物情蟻知軍陣法蟲作緯車聲身
老唯貪睡兒痴亦情畊騰騰復兀兀何以報時平

又

寓世久成贅忘家生若浮安能三太息惟有四宜休屋
壞無全堵船輕每信流鴟夷幸無恙賴爾可消憂

小室

窗几窮幽致圖書發古香

古香見米元章書畫史

尺池魚鱖鱖拳

石樹蒼蒼老去身猶健秋來日自長養生吾豈解嬾或

似嵇康

贈道侶

蒹葭人多有惟君獨造微丹成河自塞吟罷劍俱飛酒
市尋差易雲山覓更非何時醉携手為我發玄機

舟中醉題

風吹蘆荻聲颼颼晚潮入港浮孤舟老民已埽市朝迹

造物全付江湖秋
項里廟前是魚市
禹會橋邊多酒樓
醉來且復過此日
莫為礎杵悲無裘

又

鮑郎山前煙雨昏
疎燈小市愁偏門
上船初發十字港
鼓棹忽過三家村
孤鸞對鏡空自感
老龜搯床何足論
但願諸公各戮力
上助明主憂元元

偏門十字港三家村皆地名

出遊莫歸

東行西行日莫歸
川雲漠漠雨霏霏
蝗餘場上禾收薄

酒貴街頭客醉稀
買犢躬耕空自力
灼龜占歲又成非
稚孫索飯殊關抱
憐汝何時得瓠肥

園中作

紉巾一幅立斜陽
本尚無閒況有忙
雞犬往來空自得
禽魚翔泳各相忘
欲裒莎草無多綠
未落梧桐已半黃
徂歲匆匆成絕嘆
瓦溝行復見新霜

劍南詩彙卷七十七